

四庫全書

集部

欽定四庫全書

東里續集卷四十四

明 楊士奇 撰

碑 頌 賦 表

勅建禮部之碑

宣德六年十月北京新作禮部成尚書胡濙奏請樹石刻文以示久遠制曰可其文以命臣士奇臣既拜受命謹按禮部在唐虞為秩宗在周為春官大宗伯所典天神人鬼地祇之禮而禮樂庠序風化制度品節之事咸

屬焉我國家列聖相承法古制治尤重於斯皇上臨御之初茂簡俊乂以稱厥任時濙以禮部左侍郎兼南京國子祭酒奉命還禮部數月陞尚書上諭之曰國家所重祀事朕夙夜祇奉天地宗社暨于百神以迓福生民爾其懋相予無怠凡國所用彝典爾惟舊章是循是式用佐予理無忽爾惟寅惟清用懋副朕命濙拜稽首言臣敢不精白一心以圖稱萬一蓋上所命濙與虞舜即政命伯夷者同一道也而嗣大位以來祀享受福川岳

奠寧歲屢豐登田里給足灾沴不作遐裔畢來禎祥之物駢見疊至皆本於皇上誠敬所格而德化之效也于時北京創建未久百司官府皆未作其公署及治文書之舍率就簡便蓋未暇及也一日漢奏事殿中上曰國家大典禮悉隸禮部非可以簡其官府宜先備勅工部作之度地於大明門之東西向中為正堂堂之側為司務廳前為周序為中門為前門正堂之後為後堂左右為賓客之位後為庖庫堂序之外為四屬儀制主客在

左祠祭精膳在右鑄印在中門之左其地亢爽其材堅
良高明邃深制度弘偉方之近代綽乎過焉既成以聞
命京師諸司長貳咸往落之命光祿賜宴恩澤之隆群
情歡溢咸謂皇上惇典庸禮啟自宸衷始作斯宇甚盛
舉也臣惟禮者天理之具於人事而行之以敬者也用
之事神而神享用之為政而政修用之教化而教化孚
用之制作而制作盡善故禮所以為國家天下之大器
不可一日無者而典之必得其人惟皇上知之明而行

之果也然臣伏覩未作禮部之先有司以上所居宮殿
庫隘請拓地改作上曰朕方惓惓息民為心居室豈今
所急却其奏既而出璽書命諸司詢民瘼施振貸已逋
責暨禮部成有司復請改作宮殿且言治材已具上曰
朕夙夜求民之安今天下匹夫匹婦豈皆得所而何暇
於自求佚若等宜體朕卹民之心敬哉勿忘又却其奏
而出璽書敷布德恩存卹鰥寡招懷流徙且飭有司蠲
弊舉廢修懷保之政蓋聖仁一念保民惟日孜孜昔大

禹薄自奉而所勤者民之事所致飭者宗廟朝廷之禮
與皇上聖心異世而同符猗歟盛哉是役也重禮為先
務而再却有司之請聖德之大者臣忝職史氏謹備書
之而繼以詩曰

稽昔帝王禮莫重焉天叙以勅人文以宣其用之嚴曰
郊與廟教化制作咸禮之要皇明龍興列聖御極盛德
光華有典有則皇帝繼統躬禮導民從容安行天下歸
仁翼翼北京視周之鎬桓桓六卿群辟之表有虞秩宗

咨命伯夷帝謂臣濇往哉汝諧肅肅三禮汝祇相予凡
百儀度汝慎攸司爰初經營六官之府帝謂臣濇權輿
宜汝寵章自天臣工祇率力齊材良成之不日天闕之
南端門之東輪焉奐焉閭廓穹崇維皇明聖以禮為國
維明維果有此奕奕維孝維恭大禹攸同約已勤民菲
食卑宮矜卹無告惠鮮鰥寡文王小心日不遑暇仁澤
流霈源源弗窮悅懌歸赴如川之東禮序樂和化淳俗
厚龜龍在沼麟鳳在數體信達順維聖之功執事有恪

維臣之恭夙夜其勤式告有位維寅維清以熙帝載

靈慈宮碑

踰淮而濟而汶兩京之通道也凡南方兩淮兩廣江東
西湖湘浙閩黔蜀其方伯郡邑百司與夫海外番國蠻
夷君長之貢獻朝覲受事請命者商賈之懋遷者往還
交錯蚤暮不息而事之重且大者軍國所用租賦悉出
南方郡邑永樂初命平江伯陳瑄率舟師道海運北京
然道險所致無幾乃浚濟寧臨清之河以達北京以便

饗運歲發數千艘每春冰泮則首尾相銜而上河陞且
淺一雨驟輒溢雨止復竭加有洪腴之艱且險舟稍不
戒非覆則膠時平江公仍奉命督饗運慨然念曰凡大
山長川皆有主宰之神能事神則受福徃年吾董海運
凡海道神祠吾過之必顛顛持敬如神之臨乎前也間
遇風濤及魚龍百怪有作輒叩神祐靡不響應今茲祠
祀未建非缺典歟遂作祠於淮北之清江浦以祀天妃
之神蓋公素所持敬者凡淮人及四方往來公私之人

有祈於祠下亦皆響應守臣以聞賜祠額曰靈祠宮命
有司歲用春秋祭於是董鑲運參將都指揮僉事湯公
節請書麗牲之石蓋世俗所傳神肇迹事遠不可質惟
神者天之所命天固以利物為心也神斯無不在誠斯
無不格誠神乎而福澤降自然之理也既為書作宮所
自又作迎享送神之辭俾歌以將事辭曰

潔芬馨兮芳筵奠蘋蘩兮清醑吹參差兮鼓瑟紛望拜
兮堂下神來降兮雲中導霓旌兮鸞駕蓋從海若兮河伯

錯玉節兮瑤珮神戾止兮憺安悅下人兮恂忱風泠泠兮
帝愍恍若睹兮居歆神昭昭兮在上人總總兮在下紛
有祈兮不齊神均錫兮靈祐車道陸兮履坦舟循川兮
安流風與雨兮時若物阜成兮神之庥歲祈報兮有祀
神倏往兮忽旋上衛國兮下民生神惠同淮流兮千萬
億年

通濟河碑

南去通州二百里楊村驛之北河屢決河仰受白河湯

河潞河諸水下合直沽南來之水入海凡齊魯汴蜀湘漢江廣閩浙之賦運及海內海外朝覲貢獻之上于北京者皆道此以達所係之重也其水之失性也自洪武之季至今四五十年之間屢決屢築築已復決智單力疲公私患之皇上嗣大統之明年秋有司以決聞請如故事可之三年春復決上曰治事必得其理得人斯得理矣朕其慎簡遂以命太監阮安安頓首受命行還奏水當順其勢導之今逆之抑使紆屈勢畜不得達故決

宜取徑道改鑿使其順下臣視河西務徑行二里許可
鑿計用萬五千人一月庶幾可免決遂以圖進上曰理
貴變通今以命爾遂命武進伯朱冕發卒少保工部尚
書吳中發民如所計之數諏日興役以安董之安周行
撫勞厚其廩食時其作息吏絕欺弊人勸就工調度有
方如期竣事遂陞其故道河之下趣坦焉安行夾河築
防既崇且厚伐木以捍之植樹以固之草險為夷往來
愉懌事聞賜名通濟河既又奏建祠祀河神以道士主

之士竒嘗經祠下艤舟登望徘徊嗟咨成事之得人建功之有時也少保吳公間屬記是役之成古者治水自京師始先所重也斯河之重固以京師然昔者作之難而今作之易何也非奉命之臣其用心之誠與公者有異乎誠則志堅而慮精公則民悅而功遂天下未嘗有難為之事顧所任者何如耳斯役也實本於皇上之善用人之明任之專此功之所由成也自古英君明主所以克興事功未有不由斯道謹因紀是役遂推本作

詩以頌聖天子仁明之功詩曰

水之為性順下焉耳治循自然斯得其理都城之南河
決自昔謀者弗及勞者弗息正統三祀再以決聞惟帝
聖明慎簡用人顧謂臣安汝往祇命安拜稽首夙夜惟
敬秉誠致慮惟惠用下厥績之成行者抃舞滔滔安流
有厚厥防簡任得良惟帝聖明帝仁如天覆被率土誕
用材賢弘靖四海

頌

騶虞頌 有序

洪惟皇上以仁聖受天命嗣大寶為天下生民主一用
堯舜禹湯文武之道教之治之既肇建北京迺永樂七
年車駕巡幸遣使者行郡縣存問高年咨求賢德及察
民所疾苦明黜陟之政明年遂率六師平殘寇除邊患
是年車駕還京師又明年麒麟出定州人皆以為皇上
肇建北京仁恩廣被之所致也十一年二月復巡幸焉
遣使郡縣如前制五月騶虞見濟寧州曹縣車駕所經

之地益以為聖仁之應臣謹按載籍騶虞仁獸也帝王有
至仁之德則見先是永樂二年騶虞見釣州至是再見
天鑒聖仁駢答靈貺宗社生民萬年太平之瑞也謹撰
騶虞頌一篇上進頌曰

洪惟聖皇撫御萬國聖皇至仁與天合德大哉巍巍文
治武功天下歸仁如川趨東迺從民志迺循聖經考卜
維正肇建二京翼翼北京表裏河山鳳翥龍翔拱衛鬱
磐岱宗左倚大行右峙瀛海東環沃壤千里土厚水甘

天府之國北辰崇高四方之極紫微端門玉闕金城聖
皇巡狩六龍時乘永樂癸巳仲春令月下詔省方吉日既
輶翠華揚揚鸞鑣鶴鷁六師泂泂萬乘啟行道淮歷徐
經濟涉魯撫耄咨贖咸暨黎庶覃霑德恩甘雨麗日下
被萬物光潤充悅如游春臺熙熙陶陶至和召祥聿見
于曹皓質玄文虎軀猊首不踐生芻根性仁厚是為騶
虞聖仁之徵曷其于曹乘輿所經臣民耆老進獻彤陛
歡呼拜跽時巡之瑞時巡之瑞豈惟騶虞煜煜祥麟肇

先發之騶虞呈瑞豈獨東魯肇先發之鈞州之野惟皇
仁聖天下蒙慶靈祥駢臻丕顯天命皇圖隆安聖壽齊
天四海又寧千萬億年

瑞雪頌有序

臣聞天之生人也必命仁聖為之君主使助天之所不
及君之代天理人也必體天心使之各得遂其生君順
事乎天不違於君而福降焉昔者堯舜禹湯文武暨
我太祖太宗仁宗三聖之為君也皆以仁民為得天之

本欽惟皇帝陛下躬膺天命嗣祖宗大位惟天之心與堯舜以來數聖人之道是存是用德音數下惠澤弘敷撫億兆恤困窮蠲負逋革貪弊任老成明政紀簡拔賢俊布列中外親選郡守咸賜璽書而遣之一皆所以為安民也於是天下晏然邊鄙無事兵甲不用歲屢豐稔流徙悉歸太平之世也然聖心恤民恒勤夙夜猶慮其有饑寒之患未嘗忘焉宣德庚戌之冬天氣融和迨十二月尚未有雪間視朝之暇顧侍臣歎曰將如來歲農

事何是月巳卯之夕大雪遠邇彌積翌旦上御奉天門
天顏愉懌親制喜雪之歌灑寶翰以賜群臣又命光祿
賜宴群臣拜賜懽感萬萬蓋前歲之冬亦少雪上以為
慮立春後數日雪乃大降上喜嘗親製喜雪之詩其歲
四方大稔故至是而來歲豐稔之兆皆信其必有徵矣
太平之瑞何以加此臣忝侍近目睹皇上愛民得天之
應無任忻躍敬撰瑞雪頌一篇五章章九句謹錄上進
伏惟聖覽焉具詞曰

維天地之德生民為大爰簡明聖付厥覆載付之惟何
俾育俾治肆三五肇興篤仁與義式儀來世右一維皇

太祖太宗仁考咸膺天命撫有億兆維天德之肖維仁
義允蹈維民是保澤涵四海被于八表右二維皇至仁

上帝是崇祖考是恭下矜于瘵痾夙夜敬在躬帝鑒淵
衷凡欲罔不從泰和洋洋萬邦屢豐右三維歲上章維

月季冬皇豫恤農功勞心忉忉吉日巳卯雨雪其濛率

土其同兆我豐年民庸歌颯颯右四維皇聖誠維上帝

降祥用溥生成兆民永寧四海永清皇壽萬億齡如日
之升小臣賡歌用揚頌聲右五

瑞應麒麟頌

有序

宣德八年閏八月西南海外諸番國或其王親行或遣
子弟或遣大酋泛海越數十萬里而來朝貢麒麟獅象
珠玉珍貝奇異之品用達誠意麒麟凡四而出非一所
其言曰蠻夷之人邈處海外瞻仰中國如天之上比十
數年來海波無虞山島所聚種作蕃阜民咸安適聞之

老長言此太平之象也必有聖人奉天命主中夏施仁
布義肆誕被我遐裔已而祥麟出焉老長又言是上天
所生以為中國聖人瑞者其徃獻焉敢祇以獻遂頌伏
呼萬歲於時群臣百職以及陞衛虎賁萬眾懽觀舞蹈
稱賀臣聞自古帝王受天命有天下者能體天之心用
天之道以稱天之付畀天必悅鑒而昭答靈貺歷考伏
羲神農黃帝堯舜禹湯文武數聖人其效可見已恭惟
皇帝陛下以大聖之德躬膺天命嗣祖宗之大寶臨

御以來一以至仁覆憐天下旰食宵衣圖惟康濟無間
遠邇撫綏一心是以凡天地所覆載日月所照臨之處
靡不歸誠向化朝覲貢獻日聚闕下四境清寧纖塵不
作此皆陛下聖德之得人心者也夫得人心者得天心
之本也是以連歲四方上奏嘉禾秀麥豐年之禎上而
星文之祥下而物產之瑞駢起疊臻不可數計雖間者
霑雨稍稽而聖心惓惓以恤民為祈天之實弘敷德音
覃布仁澤壘書所至拊舞載道甘霖隨降田穀以豐此

陛下聖德之得天心者也亦豈必麟見而後始驗於今日哉然麟仁獸也四靈之首王者至仁則出出則天下平非若其他禎祥之比今茲之出實以彰上天嘉祐聖仁之隆且厚也而率來自遠方者又以彰聖德之無遠弗届也臣士奇叨在侍近日睹嘉祥倍萬忻懌謹撰瑞應麒麟頌一篇上進伏惟電覽焉頌曰

天眷下民爰命仁聖俾育其生俾復其性惟皇奉天允篤於下爰育爰訓孜孜夙夜日時兆庶咸予赤子仁之

所施權輿于邇薄海內外爰間爰限如浸之潤由邇漸
遠惟皇聖仁顓顓一心曰天付予予罔弗欽茫茫九有
仁浹義孚生息有遂蹈履弗渝既富既穀亦泰以嬉仰
足于公俯給于私三光昭明五緯順軌四序調均百祥
鞞鞞爰暨四方達于八紘民用康寧物用阜盈乃有靈
祥麇身牛尾圓蹄肉角崇丈又二音中律呂步中矩規
粲粲其文循循其儀厥名曰麟四靈之首見于夷邦夷
其敢有曰天生之實瑞天王我惟祗獻用告嘉祥迺蹈

鯨波乃造龍墀金門含耀紫殿騰輝在廷文武舞蹈愉
懌惟天降祥允昭聖德惟皇施仁六合一春表仁之祥
孰大于麟來自遐邦昭德覃布踰三倍二與時合數天
鑒在上丕顯嘉徵皇仁在御丕隆治平簡冊有紀播示
無極臣工有頌洋洋川溢臣叨禁近陳詩稽首惟皇萬
年惟皇萬壽

瑞應景星頌

有序

臣聞上天命仁聖以生民之寄惟仁聖能奉天保民而

民心悉歸惟民心悉歸而天命益隆於是百祥興焉萬福臻焉此天人感通之妙至理自然之應也粵稽古昔成周以前皇帝王暨我國家聖祖神宗其致一也洪惟皇帝陛下以文武仁明之大德嗣祖宗之寶位臨御以來至敬以奉天地至孝以奉宗廟至誠以事聖母至仁以撫天下而用賢任才制禮作樂庶政脩舉萬方悅戴於此見民心之悉歸於此驗天命之益隆而祥瑞之必應也然瑞之麗乎天者莫先於景星動乎地者莫先於

麒麟宣德癸丑閏八月甲寅西南海島數十萬里外其人獻麒麟者四此其盛蓋前古所未有也而是月戊午之夕景星見西北方蓋青赤二色雲氣而有三星皆黃色益近而聚既而天宇澄明星大如半月狀光彩煥然助月為明萬姓瞻睹忻躍舞蹈臣聞西北者天門之位也稽之載籍云四氣和為景星又云天子至孝任賢使能政令清明制作合天四海懽悅則景星見又云德至于天則景星見於天門凡此皆陛下聖德之實著者也

上天嘉應豈偶然之故哉於是文武群臣奉表稱慶以
為國家萬萬年之祥陛下萬萬年隆盛之福陛下盛德
謙不自居降賜璽書推功天地宗廟而勵群臣勿怙以
驕咸敬自脩庶答天貺益有以見聖德至誠而不息也
臣恭列朝行目睹盛美敬陳景星頌一篇凡九章用備
大廷之樂歌謹繕寫上進伏惟聖覽焉頌曰

昊天至仁敷祐萬姓俾君俾師簡命仁聖維皇奉天允
篤其敬惟天鑒觀允鴻其慶一章天祐皇明巍巍祖考

昊天同仁下民是保惟皇仁聖統紹大寶法天之行憲
祖之道二章惟皇聖仁于民之矜維聰維明求民之情

一夫弗康惟皇靡寧品彙咸亨皇心迺平三章簡任俊

乂爰脩臣職崇學興教爰新民德篤近舉遠仁涵萬國

萬國來庭如星拱極四章作樂制禮百度咸章至和萃

凝為禎為祥鳳下麟臻四靈煌煌維德動天福應穰穰

五章顯氣夕澄蒼赤流雲三星來同上直天門煜若半

月輝煥紫垣天錫之祥祐我大君六章景星肇祥軒轅

唐虞偉今示祥軒轅同符天昭皇仁率土懌愉皇德茂
隆謙恭弗居七章迺召文武迺申儆飭往勵於脩罔驕
以溢用寧庶邦用熙庶績同志合德光答天錫八章舞
蹈嵩祝拜手稽首維皇聖德純一悠久如天之高如地
之厚億萬萬年惟皇聖壽九章

麒麟頌有序

皇上嗣登大寶君天下一體天心以仁下民施賑卹已
負逋罷不急之勞溥休息之令煦枯濡槁萬物暢茂洽

氣潛弭時和民康乃四年十月榜葛刺國遣使者貢麒麟使者言自聞中國聖人在天位凡海外庶邦二氣順調百穀豐稔海波不驚耆老皆知此上之德之賜也於是奇異獸出焉耆老睹之曰此麟也中國聖人有至仁之德及天下則出此非下邦所宜有請以獻焉國王臣某敬使下臣上獻於是群臣奉表賀太平之瑞聖德謙讓弗恃為祥願諭群臣曰古昔聖帝明王一志養民故豐年為瑞得賢為瑞他不與焉周太保因西旅之貢作

書以告武王若等其有考乎予惟若等之勉輔于德以不忝祖考亦惟若等之咸邁于德庶克輔予於是羣臣仰聆玉音皆懽忻鼓舞知聖德之日新聖治之益隆也臣聞周成王時越裳獻雉蓋意中國有聖人也正與今之貢麟相類非偶然而致者若西旅貢獒武王時八十餘歲召公有慎德之訓皇上今舉召公言非惟自勵且以勵群臣尤有以見盛德之至謹拜手稽首而陳頌曰天命聖明職君與師曰時下民一統以治惟皇聖心與

天同貫曰予視民遐邇奚間皇仁之施博閱以厚撫之
靖之洽於九有九有以來海國星羅島居林聚咸圍泰
和壯艾穉孩靡灾靡害豐足恬嬉曷知攸自雨暘調均
濤浪帖寧者嗇其知曰聖有興瞻望北辰拜頌稽顙聖
德極天祐及遐壤厥產異獸牛尾麕身圓蹄肉角厥名
惟麟者嗇曰嘻聖仁所召天王之禎下土

闕

浮海涉

江來獻闕下公卿百辟舞蹈稱賀惟皇明聖弗眎為祥
曰天之鑒在乃德明周有貢葵公奭作訓慎德之辭敢

忘祇順凡古明聖遇祥思戒逾邁於行厥績乃大凡爾
在廷咸予股肱咸祇于德予治乃興群臣拜稽皇帝明
聖聖有明訓臣敢弗敬虞周君臣協志交脩偉今明廷
媿美虞周臣老無庸欣幸遭際敬陳頌詩仰祝萬歲

出師頌有序

永樂四年安南黎寇作亂朝廷屢遣詔使諭之弗悛益
驕賊弒其王毒虐國人甚於水火走奔訴告咸集闕下
皇上震怒召文武群臣諭曰予承天命保康兆億民一

民弗獲惟予弗恭有弗迪而遽誅斯遏抑厥自新乃有
弗迪底于再三而釋弗誅惟予弗君今盜滋弗迪予必
不釋群臣合辭力贊必決乃昭告天地宗社山川命成
國公朱能佩征夷大將軍章率左右副將軍左右叅將
暨神機橫海驍騎游擊鷹揚五將軍率兵八十萬討賊
七月某日師行上臨江送之既禡申命總兵能若曰汝
其率師往行天討惟盜父子沿襲悖兇神人共忿必誅
不釋厥暨同惡必誅不釋凡厥脅從咸釋弗誅汝往欽

哉惟茲安南咸朕所統厥民滋困于盜罔攸訴告汝其
往弔罔有侵害或有侵害既殄戮盜猶底汝罰汝往欽
哉能拜稽受命祇承惟謹遂大饗將士是日天宇朗霽
雲物不作戈矛耀日旗旆亘雲士壯馬肥紀律齊肅巨
艦蔽江長風翼颿神邁電馳不疾而速浩浩乎已氣吞
跌鳶之壤於萬里之外矣天顏悅懌豫必成功鸞旂旋
闕瑞彩騰霄臣執筆從屬車親聆玉旨之敷仁覩總戎
之恭命士氣奮發嘉應之孔昭敬作出師頌一首其詞

曰

天眷皇明咸界所覆凡厥有生俾育得所惟皇奉天仁
懷義撫日月所照恬嬉鼓舞逖彼交夷在國南裔迺有
蝮虺為毒為厲哀哀無辜罹厥吞噬屢詔申誨弗遷益
悖皇赫斯怒爰急拯焚迺敷綸言迺告明神諏日誓師
大江之濬天宇澄霽廓無纖氛如虎如貔師徒勁堅如
雲如霓旗旒飄翩甲冑弓矢戈矛戚于其列秩秩其氣
桓桓帝謂汝能汝仁且武其總率師往靖夷土除惡務

首綏良務溥仁義之行毋違天者臣能拜稽臣敢忘敬
帝德承天臣職奉命惟帝之聖舜禹為君惟能之賢方
召為臣南交氛壇不日澄鮮王師勞勲不日凱旋八表
一統皇明御天小臣作頌豫歌太平

御書閣頌

有序

臣士竒自布衣被召太宗皇帝入繼大統首擢翰林編
脩初建內閣於奉天門內簡任翰林之臣七人其中所
職代言屬時更新凡制詔命令誠勅之文日夥而禮典

庶政之議及事之關機密者咸屬焉車駕屢賜臨幸七人恒早朝退即趨閣治職事莫乃出七人者士奇與焉越三月進侍講又明年冊仁宗皇帝為皇太子簡內閣六人兼春坊官士奇與兼左坊中允兩職之務敬脩惟謹又明年陞諭德仍兼侍講永樂七年車駕將輒北京命皇太子監國簡留文臣四人輔導其兩人出內閣士奇與焉上進而諭之曰唐太宗簡輔監國必命房玄齡卿等其識朕此意加敬慎之四人頓首受命自是車駕

北狩監國之輔無改然未幾四人者其半有事去始終
在侍兩人士奇與馬進翰林學士仍兼諭德侍皇太子
覲北京遂改左春坊大學士輟翰林兼職專輔問學仁
皇嘗指兩人諭群臣此吾左右臂也既嗣大位屢進其
官初進士奇禮部左侍郎兼華蓋殿大學士遂進少保
又進少傅兼兵部尚書繼事宣宗皇帝者十年三聖所
以寵任保全之皆一心嗚呼今龍御升遊皆遠矣每捧
讀向之所受寶章宸翰追惟天地生成日月照臨之大

德未嘗不拊心悲摧攀附無所歛過皇上嗣臨大寶用人循舊進臣少師仍兼尚書大學士所以信任之褒寵之蓋有加焉顧臣衰病餘齒樸朽無庸何能少裨分寸但感刻之誠惓惓惟固凡所受四朝誥勅及詩敬用錄副勒諸貞石藏於私家垂之綿永且構屋以度之名御書之閣謹拜手稽首而作頌曰

天命明聖統有萬邦啟于帝堯暨舜禹湯憲天為理仁霈下民有教有育有典有章東西朔南來享來王天監

于德曰忱予肖爰篤厥祜彌永以厚爰錫文武俾左俾
右咸奮勵績疏附奔奏惟帝念茲靡勤弗酬或隆之褒
或崇之爵四聖一道秉持有確有效于勤敬受靡忤顧
臣耄愚材樗量勺寵福齊均負乘惕若惟皇四聖天德
洋洋鳳翥龍騰慶雲五章豈臣眇微獨蒙厥慶斗牛之
下高山大江與被嘉榮華潤悠長

賦

神龜賦 有序

洪惟皇帝陛下自臨御以來一循太祖聖神文武欽明
啟運後德成功統天大孝高皇帝舊章以治教天下重
惟高皇帝起布衣定大業五十餘年之間聖德神功如
天地之廣大日月之著明四時之變通宜樹碑孝陵刊
示萬世乃命有司采貞石臣工趨事大小畢力既得石
幕府山之陽而碑之跗未得也復求諸龍潭山麓發地
得石龜其脩踰咫崇半於脩宛然類跗之狀又下得鉅
石光潤堅厚脩廣之度式稱跗制執事之臣諦觀駭異

謂如有神相之者遂奉龜以獻詔群臣觀焉群臣忻躍稱贊以為神龜也天錫之祥古所罕有臣竊惟禎祥之臻皆有所因周之武王聖人也孔子稱其達孝曰孝者善繼人之志善述人之事也惟陛下聖孝與武王同一繼述之勤神龜之祥職此之因宜有賦詠見諸後世謹撰神龜賦一首上進賦曰

帝秉德之純孝兮原至性於天賦初統承於大寶兮肆宏整於皇度並周武之善繼兮同有虞之終慕恒存觀

於羨墻兮非自履於霜露睇鍾山於東華兮騰孝陵之紫
氛於昭其在上兮想陟降而乘雲皇考昔肇迹兮諒順天
而應人薄四海之內外兮大一統而為君奄六龍其上
賓兮渺翠華之無方懿聖德與神功兮配天地之博闊
帝將揭以永示兮齊日月而同明表神道之廣大兮求
樂石之堅貞臣稽首而奉命兮工殫慮而陳力天既錫
以貞珉兮羌跼蹐之弗得歷天壘之崔嵬兮緣龍潭之
崩崩方慶雲蒸而在上兮瞻徘徊而翬歷靈氛告此其萃

好兮發坤藏兮其求索石有龜其渾成兮非徒像於彷彿度裁踰於咫尺兮儼咸備乎六物首翹翹而左盼兮尾宛宛而右折負文章之彪炳兮介十五其縱橫含玉潤與金精兮間玄碧之光熒質厚重而不斂兮貌閒暇而若凝其造化之所為兮合陰陽之所成有堅確而在下兮又潤澤與端夷脩廣度於跗制兮于祭獲而咸宜胡為有是姱好好兮上又有此靈龜信嶽靈之孕秀兮與川后之毓竒衆目視而心駭兮咸詫神而誇異何曠代

其伏匿兮奮獨顯於明世俛懷思而求其故兮皇至孝
之所致恭奔走而致告兮藉綺陳乎金門錫群辟俾咸
覲兮騰疊疊之誦言謂夏時而浮洛兮既誕啟於人文
茲兆祥於聖代兮允匹休乎前聞稱皇心之所求兮式
表形於所施固天道之孔明兮予以答皇之孝思况皇
考之功德兮天眷眷而念茲所發珍而顯祕兮固將以
著乎無期夫祿位名壽兮曰大孝其克膺荃神龜之出
兮亦遐齡之所徵惟皇德之合天兮昭受福之穰穰又

將錫類於萬億兮世克君而克承

瑞應白鳥賦有序

宣德四年七月廣東海陽縣進白鳥二明潔如玉曠代
希見文武群臣咸謂此陛下大德至孝之應也蓋瑞應
圖云宗廟禮敬備於孝慈則白鳥至晉中興證祥說亦
云白鳥仁禽宗廟肅敬則見而漢蔡邕云鳥反哺之鳥
至孝之應也伏惟陛下臨御以來孝事祖宗寅恭直清
奉天愛人一循舊章奉侍聖母皇太后致天下之養備

極愛敬躬行於上化被於下瑞鳥之臻實應於此於是
頌伏上表祝陛下萬萬歲壽聖心謙虛弗自為德壘書
賜諭推功於天地宗廟下暨臣工且致警勵之意聖德
廣大蓋與二帝三王同一心也自昔盛時凡遇禎應皆
有詠歌敷揚盛美今陛下仁明孜孜焉惟崇謙篤敬之
為務尤有以彰聖德之盛也臣忝以文墨塵侍從謹撰
瑞應白鳥賦一篇庶幾宣昭於萬一謹錄上進其辭曰
盛矣哉聖人之誠也達乎天地天之應也必以厥類昔

周德之昉興翺儀鳳於岐陽逮王化其旁洽來白雉於
越裳明明我皇隆孝之德幽玄以孚明神以格爾乃服
領以南苞山負海儲精凝酥寶藏攸在陸有孔鸞衆異
之產水有珠貝萬珍之聚空雲擁而川溢名古今而擅
天下也迺有靈羽並見于野稟西顛之純粹同皎皎其
皓素蓋鸞鷲就而為之衛大鵬俛而為之馭於是觀者
異焉質于鄉遂鄉遂大夫駭而歎曰帝王之瑞也曷為
其在是哉具匭函簡駮奔望北辰獻至尊山靈除塗雨

師汎塵清颯翼輶喬雲覆軒踰越嶺微道江絕湖豁天
宇兮澄霽馳萬里兮斯須於是升皇畿瞻帝居由金門
趨玉除神閒意定穆穆愉愉時瑤墀兮眎眩惑適天球
兮方潔白魯之縞兮趙之璧瑩鮮明兮同一色應日中
兮陽彩嬌服章兮畫翬大廷蹒蹒鳳同類上苑翬翬華
相輝於是公侯卿士博雅方聞稽古考德頻伏陞言惟
天祐聖有感斯應惟祥昇德有施斯獲洪惟聖皇纘緒
天位惇至德兮要道本天經兮地義擴弘軌於往指敷

至化于四裔斯穹祗之攸鑒而嘉禎之所自詠大雅之靈囿祝
天子之萬歲皇曰噫嘻天地祖考錫慶垂祚於予時保秉謙
持恭固讓弗有渙綸章以飭勵期弼諧於延久公侯卿士拜頌
稽首頌天子之神聖德愈高而愈厚侔夏禹之不代齊商湯之
懋敬保太和於海宇斯永篤乎洪慶遂進而歌曰慈孝之類兮
德孔仁充因心之推兮萬物均聖澤洋洋兮周八垠又歌曰周八
垠兮歸帝仁肇宗社兮奠以安福家與邦兮暨覆載以長春

賀白鵲表

伏以帝御下民敷仁恩之廣大天生嘉瑞表聖世之清
寧寰宇泰和臣民舞蹈恭惟皇帝陛下明同日月道合
羲軒聖治神功躋皞皞雍熙之世普天率土皆忻忻化
育之中致靈氣之毓祥睹珍禽之來獻與鳳同類蹒蹒
於帝舜之庭如玉其輝翬翬在文王之圖惟禎符之昭
貺本聖德於養民臣某等目睹嘉禎心切懽慶民安物
阜幸際大明一統之時地久天長惟祝聖皇萬壽之福

為公侯謝賜勅諭表

伏以鳳翥鸞翔垂綸章之五色雲行雨施霈德澤於九天聖心眷愛之隆深大訓彰明而懇至其為歡戴莫罄名言恭惟皇帝陛下聖哲文明剛健中正惟天為大同符一視之仁如日方中統照八紘之廣茂神武以綏靖闡文教於雍熙近悅遠來浩若百川之赴海時康道泰藹然萬物之皆春式俾凡愚均深化育伏念臣某藉先臣之餘緒受國家之厚恩稊且非才未嘗寸鏑之試貴而襲爵遽崇五等之封臣某昔當北平之時曾備驅馳

之列錫封行賞既大賚之覃施掩類棄瑕雖末勞而必
報鐵券丹書之榮寵金貂玉帶之光華咸膺貴富之隆
申降保全之澤舉舊章之歷歷垂聖誨之諄諄義重君
臣恩深父子擔恪恭於佩服庶仰副於生成聖壽延長
祝天地而同久皇圖隆盛昭日月之大明

賜為善陰騰百官謝表

伏以聖皇統御弘敷天地之仁大典渙頒普錫臣民之
訓洪恩所被海宇均歡恭惟皇帝陛下文武聖神高明

廣大躬膺天命作之君作之師主宰下民教以孝教以弟輯古今之善行備感應之明徵諒惟陰騭之脩必有自然之祐申之聖論所以開人心之聰明詠以宸章所以妙人心之感化同大舜之與人為善同洪範之敘福錫民俾閭閻畎畝人人有樂善之心而華夏蠻夷家家享施德之報大一統文明之治崇萬年宗社之安臣某等叨列朝行首膺寵賜深切忻愉之至永堅佩服之誠德教昭宣幸遇聖人之在位皇圖隆盛恭祈洪福以齊

天

賀嘉穀表

伏以皇明景運昭日月之光華盛世嘉祥應歲年之大
有至仁所召率土騰懽恭惟皇帝陛下德合上天功高
前聖大一統文明之治建萬世太平之基六合八紘戴
皇恩之化育千祥萬瑞皆聖誠之感通維茲嘉穀之生
允協豐年之慶榮衆莖於一本垂蕃實以駢枝雲藹星
疇茂瓊桴之或或日融鱗隰粲金穗以煌煌三農咸瑞


應之惟四海共豐登之喜既堅既好樂甫田之十千如
櫛如墉訶實積於萬億誠本皇上聖仁之廣運是以昊
天靈貺之昭乎寰宇生民際雍熙而富碩國家宗社長
隆盛以奠安臣某等恭覩禎祥切深懼忤民康物阜親
逢聖朝九叙之惟歌地久天長仰祝皇上萬年之洪福

甘露表

臣某等恭覩永樂十七年十一月十七日至二十日連
日甘露降於孝陵松柏其凝如脂臣某等謹按瑞應圖

曰甘露仁瑞之澤其凝如脂又曰聖王之德上及太清
下及萬靈甘露下此國家上瑞今降于孝陵誠本皇上
大德上感通于天地祖宗下廣被于天下生民所致以
隆皇上萬萬年之洪福國家萬萬年之太平謹奉表稱
賀者臣某等誠懼誠忭稽首頓首上言伏以聖皇撫運
大德合于唐虞甘露自天瑞應昭乎日月臣民懼忭海
嶽光華恭惟皇帝陛下文武聖神剛健中正恭事天地
宗廟秉聖德之純誠尊臨四海萬邦敷仁恩之廣大治

教崇高於列聖雍熙普徧於八紘上得天心助順之隆
下得民心懽戴之盛泰和充溢瑞應蕃臻今茲甘露之
禎祥復見孝陵之松柏聯珠撒玉含翠葉以清妍綴雪
凝霜粲丹柯而芳潤如飴其美承陽不晷致和本自於
聖人為瑞實彰於景運隆皇上萬萬年盛大之福肇國
家萬萬歲太平之基臣某等守職南京躬瞻上瑞河清
海晏均承如海之深恩地久天長恭祝齊天之聖壽無
任瞻天仰聖激切屏營之至



東里續集卷四十四

欽定四庫全書

集部

東里續集卷四十五

詳校官檢討臣羅國俊

中書臣劉源溥覆勘

總校官進士臣楊懋珩

校對官中書臣范鏊

謄錄監生臣王增賢

欽定四庫全書

東里續集卷四十五

明 楊士奇 撰

像贊 銘 贊

彭士揚像贊

其立也躋而卓其學也劬而博其執行有常其謹度有
恪不亢不屈匪襲匪裸贊王師於九伐而才用未竟友
朝紳於兩京而文譽以灼晚霑一命辟雍之學人蓋仰
其冠紱之榮而已不改簞瓢之樂此所以表君子之能

約而多士之先覺者歟

胡子貞先生遺像贊

是吾廬陵胡忠簡公七世孫也神粹而色正氣和而志醇夙秉執於廉潔允蹈履夫義仁濟南遺經啟迪乎來學太丘行義表率其鄉人頤天和於林壑偉儀度於縉紳嗟年歲兮遽遠懷道德而莫親瞻遺像之儼然起予心之憤憤

陳處士像贊 有序

漳州陳處士念其子或遠仕欲歸養而未能會工繪其
像畀之且為書諭或曰對此即對父矣子事父豈必養
乎能承父志足矣吾之志在汝致恭君命無他也處士
其賢父哉或為秋官主事以像求贊一辭余嘗聞處士
行義於或矣遂述為贊蓋將使其子若孫皆圖無忝云
其儀之恭其存之忠其脩也禮以為防其行也孝以為
宗既承其先又啟其子眉壽而康茂膺蕃祉

楊學士像贊

濯濯其容色肅肅其儀度闔爽而縝密剛直而公恕縵
潔靜精微之學發瑰瑋竒瞻之文奮騫翥於賢科振芳
華於詞垣當泰和亨嘉之運崇論思宥密之地隆九重
之眷寵極千載之遭際玉堂金馬人瞻其榮忠君愛人
我識其誠國之貴重清廟瑚璉士之光華斯文冠冕

鍾子勤像贊

和易而方通敏而直昉鄉序以育材升賢科而肇跡際
明盛之時典綸綍之職式光以榮益慎以迪斯其禁近

歷二十年而所履坦如一朝夕故貌其外者既得乎彷彿而與之游者聊寫其平昔

黃少保致事像贊

少潛心於經術壯發身於科第兼內外之制嚴清密之地履公為道秉直為義居貞也出處惟一持介也夷險不二篤至敬於四聖之朝進崇爵於三孤之位任調均夫玉燭存筆削乎金匱才宏識遠帝方資賢臣之輔名遂功建人咸高君子之退八袞伊邇諸福斯備鴈蕩天

台超遙地上之仙鶴氅綸巾希特人間之瑞也

謝庭循像贊

雍容而夷坦恬憺而靜貞弗伉弗嫵靡雕靡矜抗浮雲
兮素尚含清風兮雅詠寄妙翰於林巒亦自怡其情性
躬承當宁之知日侍幾務之餘隆寵祿之屢進執敬畏
而若虛所履之確所存之厚蓋舉世高其藝而君子重
其守也

顧仲華像贊

為子克孝為父克訓於急能周於乏能賑卓犖其氣蕭
散其韻晚歲京華壺公仙隱厥嗣之良陽煦玉潤式崇
孝養壽祿彌進

蕭德穎像贊

桃華源上淨纖塵雲白山青隱者倫南宋賢科遺澤在
詩書瀟灑樂天真

醫士何彥澄像贊

究農軒之精體生育之仁其志所存與物皆春不芾不

纓蕭散初服壺居廓焉奎光下燭

孫處士像贊

儼乎其儀坦乎其存本於家者孝友之誠重於鄉者信義之博於愛人也衆號曰長者於操已也郡禮為嘉賓有詩有書以淑子孫有行有文在賢嗣人享祿養於高年蓋壽福其方臻也

蕭德玉像贊

此老南宋進士之孫秋官郎曹之父敦履於素祇懼于

度桃花溪水蕭散乎其居雲白山青浩蕩乎其趣傲松
栢之冰霜怡桑榆之遲暮想其樂之優游寫余懷之嚮
慕

王彥鼎像贊

其起家以進士其入官自御史儼巍哉於薦冠肅對越
於龍陛明乎憲紀之重體夫欽恤之意嚴而不厲寬而
不肆挾清冰於夏寒挺喬栢於晚翠方茲升佐於外臺
又將盛行其志者歟

况伯律太守像贊

剛正之氣卓特之才其潔清之操一塵不滓其執守之固千夫莫回既明且果亦敏以勤官朝署也事三聖惟其敬典侯邦也在千里惟其仁靡暴弗馴靡悴弗煦令行秋霜惠流時雨歲久當遷民攀留者萬計天從所欲詔特俾之重臨昔張益州前後其異施若况吳郡必古今而同心者歟

楊彥素像贊

此宋西昌三登仕之雲孫承清白之世出詩書之門弗
名之營弗利之騫脫畧埃氛栖遲丘樊采林芳以容與
濯澗清而盤桓優哉悠哉白髮蒼顏蓋閱蘭若於屢謝
而挺松柏於歲寒者也

自題朝服像贊

爾簪爾纓爾琚爾珩煌煌在躬肅肅在庭爾直爾清爾
忠爾貞夙夜惟欽無忝所生

胡隆成像贊

擢芝山之秀涵番湖之清敦朴而直諒寬厚而和平遭
逢明聖之朝發軔逢掖之士鷹冠烏府嘗馳譽於冰蘖
伊洛嵩高亦肅清夫憲紀頽顏皓首象笏朱衣優哉悠
哉式繁壽祺

陳德遜像贊

資醇而馭履善而夷忠信自固恬憺自怡有詩有書克
承于家有冠有紱于家之華蘭褱蕙帶江山在庭歲寒
松栢天錫長齡

熊用學太守像贊

外和內貞履義緼仁持躬以廉守職以勤才敏於庶務
惠浹於庶民蚤珥廷陞之筆久典郎官之署鳳陽羨
視漢三輔人之允懷次公叔度其豐城之寶氣將賢譽
而並著乎

蔣隱溪遺像贊

有佳人兮溪之陽酌清泠兮壽而康溪繚曲兮誰入其
居默存吾道兮靜閱吾書溪之雲兮朝飛紛婀娜兮飄

素衣溪之風兮增夕波又逍遙兮獨行以歌溪之路兮
幽且長忽而遊兮無何鄉悵予望之兮溪水茫茫

蕭孟廉像贊

承忠厚之世涵詩書之澤冠纓肇續前後赫奕以直諒
之資通敏之識惇用孝友雅持謹飭獨嘉邀於雲林而
樂志於泉石恬焉泰焉以游以息詠考樂於古詩誦履
坦於大易其超然享福祉於無數也歟

蕭編脩孟勤像贊

貌清而氣和志端而履莊孝弟其行之本忠信其存之
良漱六籍兮芳潤吐三秀兮文章奉大對於彤陛參高
步於玉堂承明延閣之從容詞林藝苑之翱翔縉紳所
臧譽聞式彰承昭代而日濟其所至蓋未可量哉

蔣吾望像贊

世積善仁躬蹈禮義居靜葆和守約持慈有溪有山蕭
散畫圖娛適燕閒有琴有書鄉靡競爭賴平與公捐廩
以施式惠瘵痾好德有恒厥應斯厚既富康寧茂介於

壽

長史霽菴遺像贊

其志之篤其行之肅其學之克其文之或粹乎其中之
韞閤乎無外之暴持憲紀也嘗振乎風裁輔親藩也式
勤於啟沃詩書之宗焯焯其克承忠節之世偉偉其不
辱已乎民服其人如玉

周士暘遺像贊

鄧士周增士暘往年在南京余識之於其冢子春坊司

諫冕所今年具季子鑄印局副使濂出此像求題蓋謝
世久矣冕濂皆有文於余往還故不辭而為之贊曰

惇孝與悌持義與禮其緼之醇其服之玼遺情物外樂
志塵表有朋有徒有續有紹日湖澄明梅牕幽馥懷哉
若人逝矣貞獨

曾克復遺像贊

含和茹醇履素蹈貞佩春蘭之鮮潔滄秋鞠之清芬超
乎塵紛鞅鞅之表熙乎無懷葛天之民備諸福於厥躬

垂慶澤於後昆噫吾猶及及其光儀而今何可以復親也

梁叔莊像贊

孝友行仁之本而有稱於宗族鄉閭經術傳道之正而有施於黨庠國學既溫且良亦慈而恪顯顯儒林允矣無忤

賓畿弟像贊

奕奕厥宗旌孝有坊邳邦之政德音孔彰其本之端其

植之躋秉肅與恭晚逾桓桓被古人服求古人心優游
桑榆其樂且湛

袁叔景遺像贊

逢掖之宗世科之裔夙有文藝有才與志大廷之對策
名高第命不及試睹像興喟

湖廣按察使羅文衡遺像贊

孝友溫恭廉直莊毅發軔賢科歷階膺仕薦冠中臺有
紀有綱熙如春暘肅如秋霜茫茫湘漢奠國南服仁綏

義門民遂所欲嗟乎已矣遺像儼存悠悠之思係其後
昆

御史楊君像贊

其為人也剛正而用恕廉清而蹈矩有志有才遭逢明
主鐵簡豸冠栢臺烏府振厥紀綱何有強禦蓋以之持
憲則夏日秋霜以之臨民則名父杜母者也

羅文振像贊

為子也誠於事親為兄也篤於兄弟質直而謙恭和厚

而坦易忠信重於鄉閭謹救存於交際家雖貴初未嘗
以恃積非厚克屢散以濟此廩書所以旌褒義民非古
人所號稱善士者乎

贈禮部主事龍君遺像贊

科第之宗德禮之門必厥行言貴若璵璠吟詠詩書道
遙丘園栖迹白雲謝志華軒積善之遺有子有孫身後
之榮偉茲慶源

蕭知縣像贊

其襟宇坦而和其操執謹而恪居貞以靜安澹以泊理
人有愷悌之德處物有雍容之度吏之典則民之父母
譽聞之興昉茲洋洋祿位之進其曷可量哉

故友工部侍郎趙公孟弘遺像贊

性情夷曠襟宇濶畧智識超卓行義磊落處貴富而能
約履憂患而不忤惟其無累乎外故亦無往弗樂我懷
伊人九原不作睹遺像之儼然能無慨於今昨也歟

李君時勉像贊

氣充而志端外和而內剛其學也本源純深其文也篤
實輝光史館謹嚴經筵裨益有矩有規惟正惟直玉署
金馬四朝於茲國有老成儒有表儀冑監成賢允屬耆
老需佐隆平天子有詔

郭興文像贊

其稟恂恂其儀溫溫有愨其存有斐其文懿詩書之華
冑雖衆處而不群夫既承熙明之運歷觀南海道三韓
涉齊魯游中原克克乎其見聞其將整六翮而追鷓鷯

登青雲而奮高騫也

像贊 失其名

儼恪之容和厚之氣居仁山文水之間際雍熙治平之
世康寧之福終歸於全善慶之澤垂裕綿綿

像贊 失其名

所志仁義所蹈貞潔逍遙畎畝之間雍容恭讓之節未
見其人嘗聞其風聊以識之於其德容

錢參政像贊

蔚乎其世忠孝興家溫乎其人肅恭靖嘉力學奮庸有
行有文填于大邦惠政在民奕奕藩垣祇國顯命以闕
厥施以鴻厥慶

揚節仲像贊

貌古而清識端而明蘭石表其拔俗之韻霜月同其履
潔之貞其處鄉也人仰之為王彥方其長民也世儼之
於龔少卿言行有誠進退以禮眉壽而康德人之祉

素太常像贊

挺乎東鄖之英儼乎頌臺之賢溫乎所存之厚確乎所持之堅究至理之宵微謹言行其顛顛夫論其超叔服而邁唐舉者蓋睹乎一端而未睹乎其存也

蹇尚書像贊

有序

此吏部尚書兼詹事府詹事重慶蹇公像也四方之人欲瞻望公之德容而不能得當賴畫像而傳然欲知公之存諸心施諸事者有非畫史所能彷彿士奇與公同朝久知公為悉故述其所存所施為贊書諸卷端使觀

者并得之詞曰

端厚和裕坦亮淳質本其自然表裏洞達掌綸緋於鳳
池司衡鑒於天官秉忠輔於儲闈贊訏謨於朝端膺付
託之重係老成之望其守法也雖微而必慎其執德也
蓋老而彌壯國家為心遑計其身物我為公寧厚乎人
道不任已惟是之從度存包荒惟廓有容持素履於儉
朴敦恒性於隱惻蹈遠道於康莊表雪霜之松柏斯福
祿之長自天申錫而天下之人仰望為賢科之星鳳聖

朝之柱石也

袁院判像贊

資偉而厚氣和而充寬平而直亮豁達而雍容邈和扁而軒岐蓋精探而研攻當聖人之景運奮雲興而從龍可謂千載之遭逢矣而濟物以慈蒞事以公奉上以誠脩職以恭所以承眷遇之益隆而致保和之全功也

蔣院判像贊

粲乎其文溫乎其氣肅乎其履泊乎其嗜究孔孟

之要竅農軒之秘志惇乎矜恤德施乎惠濟被慎簡於
近職切保和之隆寄極知過於儲君蓋多歷夫年歲寵
彌盛而彌恭績愈茂而愈勵斯豈非靜學之所得而緝
熙之造詣者乎

思貽兄像贊

此清溪思貽楊先生像也貌癯而清氣剛而直色正而
溫詞毅而則不矯矯以傲物不庠庠以徇後涵泳詩書
之圃散誕林泉之側紉芳蘭以為衣采瓊芝而為食安

義命於澹泊恒優游以自適惟其嫉邪憫俗之心懇懇而弗忘承先啟後之志孳孳之為亟蓋不知者或訝其違衆而知之者皆重其惇德斯所以繫多士之表儀而為吾宗之柱石者也

刑部侍郎何文淵像贊

學古入官明經致用體仁為要蹈義能勇金石其堅水玉其清秉尊主庇民之誠懷憂深思遠之情出任牧守也政有紀綱民有父母令行弊息風移俗厚入持憲辟

也殺不辜寧失不經用輔益聖德扶君子而抑小人式
取法大易正直具存祇肅其度國之蓋臣永篤其祐

陳祭酒像贊

有德有儀有學有文翺翔乎承明著作之庭肅穆乎大
學賢士之闕一字袞鉞參三朝之史錄五經道義儼六
館之師尊若夫灑落之度愷悌之存望之而山立即之
而春溫其士林之鳳麟也歟

惟效像贊

忠節啟家詩書續世發身賢科歷官憲紀有繡衣白簡
之華有虎視鷹揚之毅鐵石其存冰霜其厲回南省之
使軺持東郡之讞議蓋君子知重其仁而小人咸懾其
義年未耄而勇退超然乎林泉之高致也

劉孟恂像贊

履素居貞懷仁秉義力學而本乎經潔身以求其志飲
必澄源遊必廣術道循軌於古人行邁倫於當世所謂
聖代之逸民南州之高士若榮命之自天非天爵脩而

人爵至者歟

康紀善像贊

是為梁府紀善康先生之像其為人也坦直而不肆謹
確而能暢不卑卑以屈不矯矯以亢其學明於二帝三
王之書其仕隆學者之師資表藩輔之譽望蓋非畫史
之所能狀也

桃源蕭安恒像贊

有孝有仁有紀有倫心若執盈氣若回春既昌其家亦

安其鄉行則多宜福亦斯徵百尋之栢不為宮室過者
必瞻行者必息古之善人令之吉士遺像如生誰不敬
止

蕭安竟像贊

雍容乎其貌清洒乎其儀孝友承乎世美忠厚出其天
資雖不用時厥材則備雖弗永年人懷曷替爰有賢嗣
復有衆孫匪德之敦孰開源源

蕭德高像贊

其先嘗進士乎宋之南渡矣其家嘗世積忠厚之德於
其素矣其生際乎潤屋之富矣其身嘗自奮出代其父
赴萬里之戎伍矣其歸荷君命之嘉予矣其居復有子
孫以承懽於朝暮矣是則儼衣冠擁童豎盼紅蓮依綠
樹而行樂者固其所也

蕭德顯像贊

秀發之資英特之氣實愷以和亦卓而毅志尚乎詩書
行敦乎孝弟其才之美雖不用世其隱之樂實加於臚

仕是蓋為聖朝喬木之家而南宋進士之裔也

蕭德資像贊

溫然其容坦然其中有瀟灑高尚之意氣有磊落濶達之心胸家承富有之業能服禮以飭躬山林泉石散誕冲融蓋超乎物外之蹤而幾於和而不同者歟

彭百鍊像贊

敬行以承先勤學以致身脩職以事君持斯三者揚芳振芬睇雲霄於萬里方鵬鷲之高騫惟勵翼其有恒用

光續於前聞

劉伯墳像贊

其處也樂翠竹白沙之清其達也躋卿曹郎署之榮於
燭隱而幾若鑑之照於持憲而務乎衡之平斯以揚特
達之譽行寬恤之志將祿位之益隆吾曷究其所至

陳思孝像贊

其中之夷夷其外之怡怡其學無所不窺其辯浩乎若
馳贊百里之治民懷其豈弟躋侍從之班衆羨其委蛇

蓋優游翱翔石渠天祿而探玄抉秘商鼎周彝是以海
內之人趨陽冰之篆古而縉紳大夫推子雲之識竒也

陳仲完像贊

三山之秀長樂之英其學問之得必本於經其文章之
達不驚乎名氣宇藹陽春之和襟抱含冰雪之清不競
不練寬厚坦平蓋吾識之為玉堂之君子而春坊之老
成也

劉郁武像贊

其存平厚其資敦篤有德有行靡榮靡辱茅堂草戶藜
杖葛巾不識不知堯舜之民清泉在溪白雲在山優哉
游哉碩人考槃

周時立像贊

學優而才茂德充而行方從容乎仁義之域馳騁乎詞
翰之場父作也有長洲之文學子述也有天台之賢良
噫可謂超然無憂而樂善於鄉邦也耶

楊武侯薛公祿像

熊虎之姿金石之志感會風雲桓桓義氣恭命敵愾烈
風迅震功著社稷心存朝廷維武維忠維臣薛氏皇有
褒恩河山帶礪

曾景彰先生遺像贊

此吾澄江之南之處士也務學以植身隱居以求志推
所蘊以淑人明乎義而遺利雲林泉石于于洩洩年踰
八而望九福已備而厭世聊書其平素之槩而勵其後
之人之於善繼也耶

自題待漏像

生乎清白之宗承乎詩書之世有尊主庇民之志而學
不足以發有憂深思遠之心而才不足以濟儼冠紱之
華在論思之地耿耿乎夙夜肅肅乎寅畏期無忝於君
親蓋不知老之將至焉

蔣吾與像贊

履坦蹈和茹清服素肫肫其存顛顛其務有行有言有
儀有度超乎埃氛轆轤之表陶然雲林泉石之趣州閭

欽其高致賢達仰其良矩從容期頤駢蕃福祚蓋吉人有相之道而歸然如靈光之在魯也

自題侍教像贊

此老之生今七十有三年其仕凡三十有七歲歷事四朝恒持一志顓顓乎愷慎肅肅乎嚴畏不敢內非類之交不敢徼非義之利祿愈增而意愈澹秩愈進而心愈惴治官務如家務視海內如室內雖不能萬一之有濟而不敢須臾之或怠誠懼上孤明聖之恩有忝清白

之世閱春華之屢謝撫寒栢而猶翠聊自寫其素存示
同宗以祇礪

族孫挺來北京旦夕在左右里蕭生為寫侍教圖挺
以求贊因謾書此然士當師古挺尚從事乎遠且大
者可也

石彥誠母像贊

古人之賢成於母多矣石母之賢亦成其子矧孝敬於
下堂而儉勤於中饋是宜膺福祥於壽考益昌盛其後

嗣也

蔣配蕭孺人像贊

名闕所生君子之媿德言容功四者夙備奉尊之孝善
下之教于宗于姻是儀是效閭內肅雍有章有倫壽康
維祺子孫振振

楊武侯夫人房氏像贊

朝有重臣桓桓熊虎奉國忘家有賢內助其賢伊何舍
弘惠慈長幼尊卑一家愉怡閭內之政不嚴以肅厥德

允厚源源嘉福翟冠雲帔恩命自天蘭玉滿堂壽康百年
僧錄左覺義住持慶壽遠禪師贊

此老發跡慈源於道夙契受說圓菴於法精詣主四方
之名刹闡諸佛之玄秘蓋空寂六宗廓六如之大觀竟
究心印澈七微之奧義湛乎淵澄瑩乎玉粹斯以簡在
神聖之心再承校閱之制承上國之叢林贊弘剛於善
世祝皇祚於萬年溥仁福於一切也

上清正一萬壽宮提點鶴巢黃公遺像贊

緇金川之清叅玄都之真其中也抱一而含淳其外也
和光而同塵蓋嘗邁仙班於彤陛奉清問於紫宸於靖
海若也化潮為陸於殄旱魃也叱霆駕雲驅斥不祥顯
厥威用具體自然凝寂不動八袞高年巢鶴飛騫遺像
儼然湛兮若存

息庵禪師像贊

師既示寂其徒奉遺像求贊余素與師游為之贊曰
此吾廬陵忠簡胡公之裔而得法於青原七祖禪師之

地究儒之宗攬釋之祕悟空之真得佛之髓炯乎清鑑
之明純乎良璞之粹歷十方之鉅刹演七徵之妙義蓋
親藩嘗為之命駕而從化者隨所住而雲至晚駐錫於
都城遽遺履而西逝蓋嗣法者永慕乎其內而畫史僅
彷彿乎其外也

雪巖陳處士壽星贊

承文範先生之宗家廬陵大櫟之里和厚而嚴重端直
而劼毖崇禮尚信好仁秉義蓋鄉閭高其行而寒窶德

其惠春秋踰七而望八福禧岡崇而川至斯以祥開南
極光昭丙位錫慶流祉而綿綿之弗已也

銘

日本硯銘

員而澤靜而貞效土貢來東溟

廉謹堂銘

有序

金華朱侯為吉郡五月既治九縣就法度又惟出治之
本揭廉謹二字于退食之堂自勵也西昌楊某申為之

銘銘曰

大邦之政非廉弗任為廉有方自寡欲澄心魚噬于緡
爰困于黼誕先哲人持一介不取吉有朱侯潔清為防
維罔替厥常民之攸望

行言雖庸昧謹斯危矧是邦政非謹曷宜車馳于阪或
仆于坪肆昔明訓如臨淵履冰吉有朱侯敬事若厲維
弗渝于易民之攸賴

楊氏祠堂鍾銘

肅肅祠庭祖考是崇祇奉有嚴左右鼓鐘發音鏗鉉祖
考在上孝子暨孫苾芬祀享至愨者誠至著者神誠神
孚合錫祚千年

清慎齋銘

有序

江西布政司左參政會稽張居傑取賜誥中語名其燕
處之居曰清慎清慎者君子自脩之道也居傑發身儒
術歷官中外皆清要其廉潔之操劾愆之行著聞二十
餘年而猶惓惓名其居以自儆者蓋君子不恃其所已

能者自足且以祇帝命也將其達諸事功可量乎哉吾友賓客胡先生為之記余繼為之銘曰

凡事所務皆本諸身仕者之務承君理民事君猶天視民猶子惟義與仁發之自己心為身主惟能克明惟謹有恒厥績乃成心之弗清利欲所蔽若厥弗謹動底顛躋鑑蔽于氛濯氛斯皎心滌利蔽毫絲洞照車行于阪或仆于夷兢兢以持履豈蹈危矧儋崇爵方岳于佐矧時江右地廣民夥民之戚欣自我之貽吏之良愚循我

之為致吾湛明洗滌汙濁廓然大公以求民莫臨事顯
顯勵吾敬恭戒怠與忽審求厥中祇帝之訓恪臣之職
保民于康導屬于德退食之居大書熒如出入眎瞻用
永終譽

竹泉銘

有序

江陰朱善慶於所居疏泉藝竹適其幽澹之趣學士大
夫為之文若詩富矣又求予言予聞朱故詩禮家而善
慶慕德好文清尚士也為著竹泉銘云

植物之生竹異且特匪剛匪柔清虛正直水出於山厥
源為泉其潔湜湜其行涓涓伊竹之脩清者好之伊泉
之行智者樂之有逸者居既寬且幽有竹叢生有泉縈
流可蔭可休可鑒可湘可詠可詞逍遙徜徉凡古君子
維德之勵有觀於外必飾於內淇澳之詩衛武之彰聖
著蒙象育德之方咨善慶甫古訓是師維德之資非維
宴嬉士竒作銘揭座之隅昕夕念哉式永終譽

贊

魯王書舊學贊

有序

魯府紀善王貞侍學魯王殿下將三十年貞以禮事王
有言必正王以師待貞有言必聽嘗大書舊學二字賜
貞又係以詞其德之望之委曲周備貞間出見示夫為
親藩而得文學方正之士輔之固難為陪臣而得仁賢
恭儉之王事之尤難今觀此卷蓋交得之矣故為贊曰
奕奕魯山奠國東藩顯顯宗王維親惟賢其賢伊何如
漢東平樂善與仁惟德之行臣王貞氏博學好古秉道

與義為王毗輔王曰老成汝予師資汝言允臧予祇循
之臣貞鞠躬幾三十載敬終如初靡敢渝怠王曰噫噫
汝良先覺汝予啟迪汝予舊學念之敬之王恒弗忘大
書貺之申言孔彰貞拜稽首臣何與力臣既耄矣敢忘
厚德師友之益魚水之契維賢於賢希濶遭際臣貞來
嗣世謹寶藏珍玉所存常騰夜光

漢使牧羝贊

有序

河南布政使盱江饒君示余李伯時漢使牧羝圖嗟乎

蘇公之大節偉矣敬為贊曰

有漢之英烈烈子卿奉使北庭挺其忠貞幽害既窮飢
齧旃毛摧屈愈厲氣振愈豪川嶽可移志不可奪陵律
何人甘語乖刺羝也不乳鴈有帛書漢節來歸神明翼
扶壯齡而出皓首言返上謁茂陵淚血兼潛人臣之義
表表子卿終古弗磨日星其明奕奕麟閣有像儼如千
歲之下亦有畫圖圖傳者貌史著者心永作臣軌來世
攸欽

節壽堂贊

有序

節壽堂者番禺士胡秉常奉母之堂也合母之德與福而名之也母之德非一節特其大端耳蓋母孀居四十餘年謹禮如一日今年七十有九學士大夫為之傳與記備矣秉常以名醫徵在北京於余往還厚故為作節壽堂贊其詞曰

番有令母厥氏惟段柔懿夙成展也淑媛既媿于胡實
簪纓家父母之孝移於舅姑姑有遺息乳之育之訓之

篤之長焉有歸舅沒幾時夫也遽繼辛苦鞠躬號泣襄
事抱濟在堂上有嗣姑無怙在襁下有一孤仰事俯畜
致誠單瘁事亡猶存禋祀靡怠稱未亡人越四十年冰
澄玉潔式光所天禮度雍雍閨闈肅肅天佑德人錫之
遐福有子有孫有詩有書康寧怡愉百歲豈多高堂奕
奕有來蕃祉太史作詩表其族里

東里續集卷四十五